

**LHAMAP'A'SIN JU KIN TALA'CHA'ANK'AN, JU KINTAILHTUNK'AN CHAY JU IXLHI TA'AYAN KIN
LAK LA'ACHA'ANK'AN ANI LAKAT'UN PUEBLA.**

KILHAKTUM

**JU LHINAUKAN KA
ILHTUKALH.**

Tuchini ju kalhimispakalh, ju kalhimap'asikalh chay mabasalanikan ju lak la'acha'ank'an ju tabilanalh, juka tailhtulh tach lhich'alhkatnankan chay tach ta ulay ju ix Ukxtink'an; 'oxi ka lalhiankalh ju ka tach'ixli kin tailhtunk'an, bachu ju lakiklaiyau, ju kin lakmispatk'an, ju chibinti, kin lak pu'ilhtunk'an, ju kin talismanink'an, ju lhi lakk'uch'unti chay ju lak pakxantau.

Ju lakat'un Puebla pakxanta ju ix tala'oxin lhuniatalak'ilhtun chay lhunialakchibinti, ju anch mintachalh ju ix atsukunti ju xa lak p'ulhna tataulan la'acha'an Spialinin, Cha'auaxt'in, Nuu Savi, Ihima'alh'ama', Ts'o'onun, N'giva chay ha shuta enima, ju yu'uncha ta'tamakaulh ani lakat'un Puebla banaj aksni antukaj ix tachin ju labanan chay ta tayanalhka' ancha ju ta'tayxt'o'a lisna tu'u ma'lhtask'ini ju lapanakni, ju lhich'alhkat, ju ix maklakata tailhtun, chay chux ju ix anuk'an.

La'cha'anti ju la'ts'inlhi'an ju lhamap'asin basali ju ix atsukunti ju lapanakni ju ani ix lakla'acha'ank'an ju chabay ka alhakapu'ankana', ka tala'ts'inlhi'ana' ju Ukxtinin, liiantuju yu'uncha yu kin talakaputayayan.

Ju aksni ka lhi ch'alhkatnankana' lhamap'a'sin ju ix maklakata ju lak la'acha'an, ju 'Aya Ukxtinin chay ju Tamalhtanay Lhamapa'a'sin, bachu ix A'tsulh La'acha'anixni lhijunkan:

- a) Kalhakapu'alh, ju ka a'tayjulh chay ka amakaukalh tach tabilanalh, laktapala atsukunti, ju lhitama'a'un, chay ju lhikut'ilin atsukunti ix nabin lakla'acha'an chay ka lhakapu'ankalh ju ix lhama'an ju ki taxtuy ju ix lhi chux chay pumatamin.
- b) Ju ka chapakanchalh, ch'alhkatnankalh, chay kata ma'tanulh ju lakla'acha'n ju ta pakxantalh ju ix maklakaskik'an, chay la'ts'inlhi'au aksni ka ma'osukalh lhama'an ju tapakxantalh ju la'acha'an chay ta chininit'ajun tumpaj atsukunti; chay
- c) Ju 'oxi ka alhimispakalh ju ani laka lhamap'asin ju ix tan'ajni 'ay lhamap'aksin tan lhilakchibinin ju kintala'cha'anan, 'oxi akintala'ts'in chay 'oxi a kin tat'ala'ts'in ali'in.

KILHAKT'UY

IX TALA'CHA'ANK'AN KIN LAKLA'ACHA'ANK'AN.

Ju lhamap'a'sin 'oxi lhimispay chay a'tayjuy ju ix Ukxtink'an lakma'anin ix nabin kin lakla'acha'ank'an, ta mapa'a'utalh ju la ix ta'ayxto'nik'an tach ju ix ulakan ma'anchach, ju chuncha ka makaukana' kata ch'alhkatnalh ix t'atam, cha'o'olh chay ju ts'alanin.

Ju Lakla'acha'an chay kin lakla'acha'ank'an chay ju lapanakni, alin ju ix ix la'cha'anti 'oxi ka ta la'oxilh ba tuchichun alhiki usna tu'u ju ma'lhtask'ini ka ta ilhtulh ju Ukxtinin.

Antu xamati ka ma'tijlalh ju atsukunti' oxi ka tsukukalh chay ju laka talhistakni ni tami kin tala'ts'inkanan chay ka lhi'achau ju kin tala'cha'anan ni wa 'aya kin talhila'tsinkanan, kin ta lhimaktauk'aniyan, ju alakatam kin talhi'ankanan chay antu tu'u sk'intau, ni lakatam alhi'ankan kin as'at'ank'an.

Ka takut'ililh ju kin chibintik'an.

Kata'ayxto'li chay antu kamama'tijlakalh ni tapakxantalh ju ix tala'cha'ank'an ju lhilhu ju chunch ka laya' kata ch'ixa ju kin chibintik'an ju lhismanitaut'a'ilhtun, pulak'ilhtun, alak'ilhtunti, pumpu', asanti, ju lak at'ininin, ju ala'axp'up'unti, ju tu'u k'atan chay chux ju kin talhimispakanan.

JU tacha lhi ta'ayxt'o'kan, ju tach talalhimispay ju tabilanalh laka cha'a' , lakala'acha'an chay lhi chux lapanakni ju tabilanalh lakala'ac ha'an, chay chux ju lapanakni, ju yu'unch ju ajunkantalh katamala'silh ju ix lhak'uchun, ju lhitach'ixni chay ka ta mats'awalalh lhamap'a'sin lakat'un; ni chuncha najun ju mats'abalanti chay antu tu'u' lanilh ju kintala'cha'ank'an ju lapanakni.

Ulakantalh ju chibinti ju lapanakni ju tabilanalh lakin la'acha'ank'an ju antu ka'axkaumaxtukalh tan tabilanalh.

KILHAKT'UTU

JU IX MAKLAKATA CHA'O'OLH, ATSI'IN, TS'ALANIN CHAY AS'AT'AN JU TABILANALH LAKINLA'ACHA'ANK'AN.

Ju Ukxtin ani Lakat'un ka xt'a'a amak'atsanti, ju atalaninti, amak'atsanti laka ju ma'atpuchibijlaka'ankan chay ju lakchibinti, ju chuncha ju laklacha'acha'an chay kin lakla'acha'ank'an ju katalhakapu'alh ni ju t'akunin kata ma'tanulh chay ka a'ulakalh lhi lakatayanenin, laka ju lhipuxkajun talhaja, batam katama'tanulh ju lhichux chay bachu katama'tanulh ju laka talak'ilhtun.

KILHAKT'AT'I

ANTUXAMATI KAMAMA'TIJLAKALH

Ju laklaáchaán chay kin la'acha'ank'an tapakxanta ju ix la'cha'anti ka ta ch'alhkatnalh tach ta 'achani kata ta'ayxto'li tacha tataylhimintachalh ma'anchach chay tuchini ix lanti ju ka lhita'ayalh ju chuncha laka ju lhamap'a'sin chay laka ta'ilhtun ka lhimispakalh tach ta wilanalh chay ju ix talak'ilhtun.

KILHAKKISI

JU TALAKK'ILHTUN CHAY JU ATALANINTI LAKIN CHIBINTIK'AN

Ju tapakxanta tala'cha'anti lapanakni yu'uncha: Lhima'tama'a'ukan chay makut'ilinikan ju ma'ania atalaninti chay ju lhismanitau.

Ju Ukxtin lhi anii Lakat'un chay pumap'asinti ju yu'uncha kata a'tayjuya' ju la'acha'an chay kin lakla'acha'ank'an ju tala'oxin, ju ta'a'tayjun chay laixlhitch'ixni ju chux kin tamak'atsanti lak'ilhtun.

- Batacha ancha katulakalh tan pakxantau ju kin xalak ma'aniatalak'ilhtun antu xamati ju akintamama'tijlayan, 'oxi ka taulau chay laka talhistakni tacha lak 'oxitalak'ilhtun chay kata ch'ixli ju kintalhimispakanan.
- Kamakut'ilikalh, kamach'alhkatnankalh, katach'ixli chay ka pumala'achakalh ma'atpuchibin ju katak'atsalh ju tichini tata'ayat'ajunka', kamaama'a'ukalh laka putama'a'un chay laka cka'a', tach pu'tapasatalh ma'anchach, ju ix tachibin, ju ix puch'alhkátna, ju lakma'aniachibinti, ju ix atapast'ak'at, ju ix tats'o'nik'an chai ju ix tats'o'ni atalaninti.

Ju 'Aya Ukxtin chay ju yu bil ju laka pumapá'sin ju ix maklakata, ju basalh ka xta'li lhichux ju atalaninti ju anch katamaknukalh ju ix atapast'ak'atk'an ju lak ma'anin lakin chibintik'an ju bachu' kintalak'ilhtuntik'an, chunch ka la mispau kin chuxk'an chay ka mispau ju ix ta'ilhtunk'an maápsin ju kint'akilpatinik'an.

Ju atalaninti ju axt'a'ni Ukxtin ju kin t'amala'acha'ank'an ka xta'katl ju la kin chibintik'an chay ix ta'ilhtunk'an kin t'akilhpatinik'an.

KILHAKCHAXAN

JU TAMA'TANUTK'AN KIN T'AKILHPATININK'AN JU IX LHI LA'TS'INKAN LHITA'AYAN JU KIN

Ju 'Aya Ukxtin chay ju yu bilh ju laka pumapá'sin, ka ta nauna' tach ka lhi ch'alhkatkana' ju chunch basalh katala'ts'ilh chay kata ma'tanulh ju la ix lhi ta'ayan kinlakla'acha'ank'an ju katala'ts'ilh ju ix lhita'ayan ju ani lakat'un chay pumap'a'sin, ju chunch kata naulh tuchinitalakpast'aka kalhitakut'ililh chay ju tamaklakask'in ju chunch

LAKAT'UNK'AN CHAY PUMAP'ASIN. Ihi'acha kata taula' li ta pakxanta ju katauya', antu ta'an'ay, ju tan tala'astanan, ju lala'ts'inkan chux 'oxi la Ihi'ankan chay ali.

KILHAKTUJUN

XA NABIN JU LAKAT'UN Ju kin lakla'acha'ank'an laka lhita'a'tayjun chux Ukxtinin ju aulakantalh Ihi Amach'alhkat, ju katalhich'alhkatnana' ju xa lhista'kaan, ju sa'ka'alilh, ju kamalhu'bikalh, kalakla'oxikalh, 'oxi ka Ihi ch'alhkatnankalh ju tan bilau: 'oxi ka lhitalau ju chux Ihih'alhkat la ix nabin lakat'un chay kapixialhnankalh ju la kin lakat'unk'an.

KILHAKTSAJIN

XA LHITA'A'TAYJUN KIN LHICH'ALHKATK'AN JU LHIT'AMACHA'A'. Ju lakcha'a' tan alin Ihih'alhkat ix taulan Ukxtin chay ju ma'lhtask'ini ju ch'alhkatnanin ka ta la'ts'inlhiana' ju ix la'cha'atk'an ki nabink'an cha bachu k'atsay juj ix Ihih'alhkat.

KILHAKNAJATSI

XA LHAMAP'A'SIN KIN T'AMALA'ACHANK'AN . Ju Ihi chux Ukxtinin ju ix Ihi 'ay ani lakat'un chay tantap'a'si lakla'acha'an kata lhakapu'ana' ju lhamap'a'sin chay ju xa lhila'oxin ba tuchichun la'ayti, ka ulakalh chibinti chay 'oxi katalalhi'alh ju lapanakni, chux la'acha'an, ju chux kinlakla'acha'ank'an; ju tacha ta ulay ju lhamap'a'sin, ju amapa'sinti, tach ulakan ju chibinti kata la'mispaya' ju Ukxtinin ju ulay lhamap'a'sin li antu t'ala juni ju xa tukan ala'cha'ant.

KILHAKKAU

JU IX MAKLAkata ATAK'UCH'UN CHAY ALHISTA'KAN Ju lapanakni ju tabilananalh ani lakla'acha'an chay kin lakla'acha'ank'an ta pakxanta ju ix talakcha'ank'an ju ka ak'uch'ukalh chay ka alhista'kalh, ju yucha Ukxtin ju ka xt'a'a' las katatanuchalh laka atak'uch'unti chay ka alhista'kalh.

KILHAKAUTAM

TACH TA TA'AYST'O'A JU IX MAKLAkata KIN T'AMALA'ACHA'ANK'AN. Ju Ch'alhkatnanin ju tabilanalh ju pumap'a'sin lakla'acha'an naukantalh li ulakalh Ch'alhkatnanin ju kata la'ts'inlhi'alh ju ix ma'task'init kint'amala'acha'ank'an, chay ka ulakalh ju puchibin, lhita'ta'aysto'ni, ba tuchichunch ma'lhstak'nikan ka ulakalh Lhistaknin.

KILHAKKAUT'UY

JU CHA'A' A'TAYJUNU' JU KIN LAKLA'ACHA'ANK'AN

PULAKTAM

JU IX PUTSUKUNTU, LANTI CHAY JU IX LHICH'ALHKAT JU CHA'A' A'TAYJUNU' JU KIN LAKLA'ACHA'ANK'AN. Ju Cha'a' A'tayjunu' ju kin Lakla'acha'ank'an, ju la'atam pu ach'alhkatni ju ix akstu chalhkatnan, ju pakxanta ix lhamap'a'sin, pakxanta ju ix laktanlhun chay ju yuch najun ix tailhtun, tacha kailhtukanqa', ka pakxana ju ix pu amapalan chay ju chux ju ix alhiki', ka amapa'a'sinina' ani la'acha'an Puebla. Yucha ju Ukxtin ju kala'ts'inlhiana' ju ix ma'task'init kin t'amala'acha'ank'an chay ju tatamakaulh, ju yuch pakxanta ju ix takut'ilin ka nabilh lhamap'a'sin, ka nabiya', kamalhtananiya', ka lhinauna' ka taylhiankalh, ju la'ats'inlhi'ankalh ju chibinti, ju lhiputa'a'tayjun, ju tach ka punabikana'chay ka la'tsinkalh, ju basalh ka taxtuchalh ju ix la'cha'anti kin t'amala'acha'ank'an chay ju tatamakaulh, ju basalh ju lhilakakut'ililh kin tailhtunk'an chay bachu ju kuin talhimispakanan.

Ju Cha'a' A'tayjunu', ka lhi ch'alhkatnana' ju ani talhinauti:

- I. Kalhkapu'ankalh, kalhila'ts'ink'alh, kalhibininkalh ix maklakata lhilhulakla'acha'an, lhilhutalak'ilhtun, lhilhuchibinti ani lakat'un, bachu ka k'atsau ju balhilhucha ju talak'ilhtun, ju lapakni, ju ix lhibinti, chay ju lhich'alhkat ju putsukukan.
- II. Ju basalh 'oxi ka lhimispakalh chay kalhkapu'ankalhju ix la'cha'anti tach tata'ayxt'o'a kin lakla'acha'ank'an chay, ju ix chibintik'an tan malh ju ix atsukuntik'an.
- III. Kalhichibininkalh ju yuch xa'oxi lalhi'ankan batam ka la la'tsinkalh chux la'acha'an ani lakat'un Puebla, bachu' antu baxkaya chay ka la la'tsinkalh lhichux kama'tanukalh, ju antu xamati kalha'amaxtukalh, ju anch lhi chux ka ch'alkatnankalh, ju 'ayxtam ka ilhtu kin talk'ilhtunk'an chay kalalhakupu'ankalh chux lak la'acha'n.
- IV. Wasalh ka lhakapu'ankalh chay ka lhichibininkalh li kitnan 'oxi kalhich'alhkatnau chay ka lhilakchibininkal ju kin talak'ilhtunk'an, lhich'alhkatta'a'tayjun ju 'oxi ka ts'apshiankalh ju alhiki ani lakat'un.
- V. Ju kalajuniu tach ju ka lhitach'ixli kinta'atayjunk'an chay 'oxi kalhich'alhkatnau ju kintaxta'niyan ju laklat'un tan wilau.

- VI. Ju kat'alhinaukalh li batam kalala'ts'inkalh ju laka lakchibinti, ju laka lhich'alhkatta'a'tayjun chay ju xa lhich'alhkat ts'aps'ulan alhiki chay ka lhinaju ju tuchini kin tala'cha'anan ju ix tama'tanut ju cha'o'olh chay ju tatamakaulh.
- VII. Ju basalh ka xta'kalh ju kin la'cha'antik'an ju laka lhasakminti chay a kin tamakajun chay antu katala'achaunulh kin atapast'ak'atk'an, ju bachu kitnan ka naunau kin atapast'ak'atk'an, p'ulhna ka lhasakmininkalh chay ka'amak'atsanikalh ju kin lakla'acha'ank'an chay ju tatamakaulh, akxni ju Ukxtin najun li tu'u lhamap'a'sin ka mapaxakana' chay tu'u alhiki, li tu'u a kin ta o'xcho'o'n.
- VIII. Ju basalh ka xta'kalh chay ka naukalh li kin pumalhuk'an sk'inau ka alilh lhamap'a'sin ju ancha matanuni kala'ts'inlhi'alh tach wilau kinta'amala'acha'a'nk'an tach pumintacha'au ma'anchach.

Ju Cha'a' A'tayjunu xta'nikan ju ix lhi ch'alhkat chay ju ix ta'iltun.

- I. Ju kanabilh tach ka nauna' ju lhimap'a'sin ju chuncha ka a'tayjunulh ju laka alhtanti chay ka amap'a'sikalh ju chibinti ju ix nabink'an kin lhi chuxk'an kin laklaa'achap'ank'an chay ju tatamakaulh.
- II. Ju kanauna' li chun chay kama'tanuya', ju laka xa ilhtukan, t'ala'ojon, ju xa la'tsijun ju pulhich'alhkat, pu ta'atayjun lhimach'alhkatna ju ta ilhtuy ju ali'in Ukxtinin ju lhi ani chay chux lakat'un.
- III. Ju lhichibinkan, ju lhakapu'ankan, lhistakkan chay basalh lhila'mispakan chay ka axta'nikalh ju ix tala'cha'antik'anju lakla'acha'an chay ju tatamakaulh.
- IV. Ju kalhichibinkalh, ju kata kut'ililh chay ka ja'atayjunulh ju la ix atsukuntik'an chay ju ix ta'ayxto'nik'an ju kin lakla'acha'ank'an chay ju tatamakaulh.
- V. Ju ka nabikalh lhich'alhkat chay ka la'oxikalh chay malhubikalh ju lakchibinti ju lhimala'sin, puch'alhkatnankan, xa chalhkatju ix nabink'an kinlakla'acha'ank'anchay ix nabink'an ju tatamakaulh.
- VI. Ka naju, ka lhinaju, ka makut'iliu ju tacha task'ini ju chunch basalh ka taxtuyantalh ju ix la'cha'anti kin lakla'acha'ank'an chay ju tatamakaulh.
- VII. Ju ka nabikalh, ka naukalh chay ka lhinaukalh tach ka mapaxakana' ju lhamap'a'sin lakq ju 'Ayalhamap'a'sin ju

- ix nabin ix li'ay kin Lakat'unk'an, lhamap'a'sin lhi ani chay cha'a' map'a'sinin, ju ma'task'iniyau ju chuncha basalh ka lhimispakalh ju kin tala'cha'ank'anju ix nabin kinla'acha'ank'an chay ju tatamakaulh.
- VIII. Ju kalhipuxkabanankalh chay ka nabikalh, ju kat'a nabikalh ju la'acha'an chay ju tatamakaulh, Ju lhimala'sin ju ta'a'tayjun ix maklakata puxkabanin, ama'a'ununin ju lhita'a'tayjun chay mak'atsanti ju ix la'cha'anti ix nabi kin lakla'acha'ank'an.
- IX. Ju basalh, ju ka lhi ch'alhkatnankalh chay ka nabikalh tach ka ma'tanukalh chay ka alhimispakalh, kalhakapu'ankalh chay ka nabikalh tach ka ta lhi'achalh ju ix la'cha'antik'an ju lak cha'o'olh chay ju tatamakaulh.
- X. Ju ka lhi ch'alhkatnankalh ju ix lhimispakan ju atsi'in chay ts'alanin, ju ma'apitsin tach ta pakxanta ix 'achatk'an chay alhimispakan ju ix tapaxatk'an, bachu' li 'amaj xamati ba 'aya ilhtukan, ju lhia'nikan.
- XI. Ka lhi ch'alhkatnankalh tach ka lhi mispakalh chay ka lhakapu'ankalh ju ix tala'cha'anti kin t'amala'acha'ank'an chasy ju tamajuntalh, tach ani usna lakatam la'acha'an.
- XII. Ju kamak'atsanankalh ix lhimispakan, ju ka lhakapu'ankalh chay ka lhitsukulh ix la'cha'anti ju tatamaulh chay ka ulakalh lhilakchibinti, lhita'a'tayjun chay lhi ch'alhkat ju ix lhi tach'ixni chay 'oxi ka tabilh.
- XIII. Ju kama'tanukalh chay kat'a a'tayjununkalh lak cha'a' puchibin, 'oxi ka tatanuchalh kin t'amala'acha'ank'an laka cha'a ix pumap'asin Ukxtin.
- XIV. Ju ka lhi ch'alhkatnankalh chay ka ma ch'ixkalh 'ayxtam ka tatanunilh Ukxtinin, kata ma'tanulh, kata lakatayalh la'acha'an laka chibinti ju ix maklakata lakla'acha'an chay ju tatamakaulh laka lhi chux pumapa'sin ju Ukxtin, ju basalh kata lhi ch'alhkatnalh ju ix la'cha'antik'an chay kata ulalh ju ix Ukxtinink'an.
- XV. Ka t'anabikalh ju ix lhilamispan, lalhistakkaan, ka a'tayjukalh kat'a lhistakkalh tuchini lak alin ani lakat'un ju ix nabink'an kin t'amala'acha'ank'an.
- XVI. Ju ka lhinaukalh chay ka ulakalh lhamap'a'sin chay kata ma'tanulh Ukxtinin, ju lak la'acha'an chay ju tatamakaulh, ju chuncha ka lhistakkalh ju chux ju lak alin laka lakat'un tan ju ta wilanalh kin lak la'acha'ank'an.
- XVII. Ju kama'a'tayjununau, kama'naunau chay kamap'a'siu, ka'kat'ama'tanu ju ali'in Ukxtinin, ju chunch ka

- alhakapu'ankalh chay ka ta'oxilh tuchini talh'amti alin u ix maklakata lakat'un, task'inti lakat'un, lakla'acha'an, ju lhilaklchibinti chay ju ali tan tabilanalh kint'amala'acha'ank'an chay ju tatamakaulh ju ani lakat'un.
- XVIII. Ju kalhkala'ts'inkalh ju lhichibinti chay lhich'alhnankaan ju lhimala'sin ta'a'tayjun chay ju ix lhich'alhkat ju Ukxtin laka ma'tanunti ju ali'in Ukxtinin chay kalhinabikalh basalh ka a'tayjukalh, ka'alhistakkalh chay ka xta'kalh ju ix la'cha'anti, 'oxi ka lhitach'ixli, ju ixpulakni talak'ilhtun chay ju ix pu ta'a'tayjun.
- XIX. Kanabikalh, kamak'atsanankalh ju laka alhiki chay laka ma'atpuchibin chay ka lhibininkalh ju tapuxkajun chay ju lhi atalaninti ju ix lakata kilakla'acha'ank'an chay ju tatamakaulh, bachu' tach ka alhista'kalh ju kin lak alintik'an talak'ilhtun chay ju ix atapast'ak'at kin la'acha'ank'an.
- XX. Ka a'tayjukalh chay kata kut'ililh li a'tam ka axanapalh ju Lhima'alh'ama' chay ka ta'ayalh ju kin lak'alintik'an chay tacha lhimispakan kinlakla'acha'ank'an.
- XXI. Ju kanabikalh, ju ka sk'inkalh, ka yabakalh, ju ka lhichibinkalh chay ka chalhkatnankalh, ju tach ma'task'ini ju chuncha ka a'tayjukalh, ju kala'oxikalh chay ka lhi tachixli ju lakla'acha'an, ju ix tii, ju ix pu'atalaninti, ju ix lakcha'a', ix patakutni, ju lhimapulhkun, 'oxi xkan, pumaj'ankan xkan, ju lhi ap'alhnanti chux ju ma'task'ini la'acha'an, ju lhilhakapu'ankan tan kilhcha'an ju ix lakat'unk'an kin t'alapanakk'an chay ju tatamakaulh, bachu' 'oxi kata ch'alhkatnalh ju ix Ukxtinin, 'oxi katalalhi'alh ju la ix Ta'ayxt'onik'an chay katala'a'tayjulh chay 'oxi ka alilh atauk'at.
- XXII. Ka a'tayjukalh, kama atalanininkalh, chay kaka map'a'sikalh ju Ukxtininchay ju talakapuyana ju ta ulatalh ju la'acha'an, kin la'acha'ank'an chay ju tatamakajuntalh chux ju tabilanalh, kalhakapu'ankalh ju ix lama'talh'am ju ki la'cha'an pumatamin chi ix li chuxk'an.
- XXIII. Ma'ch'alhkatna' ka unt'i akxni ka lhasakmininkana'ka', ju ixlhi'akstu chay 'oxi kamak'atsanankalh, akxni sk'in ju cha'a' ulana' lhamap'a'sin chay taxtuyachalh alhiki' ix maklakata ani lakat'un lisna tu'u tapasani ju ix la'a'chanti kin lakla'acha'ank'an.

- XXIV. Kaka map'asikalh, kaka a'tayjukalh la ix lama'talh'am chux lakla'acha'an tan tabilanalh kin t'amala'acha'akan chay ju tatamakaulh, ju cha'a a'tayjununin ju xa ani lakat'un chay ju lakmap'a'sinini la'acha'an chay ju tata'ayxto'putun ju ma'apitsin ch'alhkatnin chay ju ix akstuk'an li chuncha ta najun.
- XXV. Mala'sin, Ju malhtanan, nabikan chay kala'ts'inkalh lisna ju puuta'tayjun, ju xa tats'o'ulan cha xa nabin ju ix lhi ta'ayanti, ju ix tan'ajni talak'ilhtun ju ka'alilh ix lhi'utk'an ju kinlakla'acha'ank'an chay ju tatamakaulh.
- XXVI. Kanabikalh, ka sk'inkalh, makut'inikan ju ta nabin chay tala'ts'in lhi chux lapanakni, ju xa tamala'sin ju lhitach'ixni banin lakat'un ju kin lakla'acha'ank'an.
- XXVII. Ka'atayjununkalh, kamachixkalh, ja kamakut'inikalh ju xa talahaja , ju ix tama'ala kin lakla'acha'ank'an chay ju tatamakaulh, laka ju lhich'alhkat alhiki 'oxi kalhajayacha'au ju ali' ka'alina' ju lhich'alhkat, ju katanuyachi tsasnat ju ba las kata lhabalh ju kin tama'alak'an, bachu' chunch ju basalh chay ba tam a kin tala'ts'inkanan ju laka tama'alanti, ast'anti chay amapalanti.
- XXVIII. Ka'atayjununkalh, kamach'ixkalh, kaat'ach'alhkatnankalh ba tuchicha ju cha'a' a'tayjunu' ju ix taulan Ukxtinin ka lhakapu'ankalh ju kin ach'anantik'an antu ka ts'an'alh kin t'ink'an ju xa ani ju uyau kitnan, yutukan lhist'ak'au kitnan, ju yuch an xauti ju kitnan ch'anau chay antu xamati ka mina mapaxana'.
- XXIX. Ka ma'tanukalh, kalakaputayakalh chay kama'tanulh ju ix ta'ayxto'nik'an, laka ju lakchibinti, laka ju Puchibin ju xa ma'at lakat'un ju bachu alin chay ma'tanuy laka Cha'a' A'tayjunu'.
- XXX. Ka nabikalh ta'a'tayjun ju lhi map'a'sin chay katalanilh ju chux ju ma'task'inikan ju ani lakla'acha'an tan bilauj chay tan tabilanalh ju tatamakaulh.
- XXXI. Ka ulakalh ju chibinti chay lhi pumalhu kata ulalh ju chibinti ju chunch lay que xta'kana' ta'tayjun ju ix nabin kin lakla'acha'ank'an chay ju tatamakaulh.
- XXXII. Ka puxkaukalh ju lhich'alhkat lhi chux ju lapanakni chay ju ix akstuk'an ta chalhkatnan chay ju 'ayxtamkata t'a'alh ju kin lakla'acha'ank'an chay ju tatamakaulh ju chunch kata la'atayjuya' ju la ix lhich'alhkatk'an.

- XXXIII. Ka ulakalh ju ix putaulan ju ancha ka makxtumikalh chay ka lhi ch'alhkatnankalh ju taput'e'ente ju tanui la'achux lapanakni bilau lhi chux kin t'amala'acha'ank'an chay ju tatamakulh.
- XXXIV. Ka ma'tanukalh la ix nabikan ju lhimala'sin ta'a'tayjun chay ka naukah tani chuncha kalakch'apa'kana' tamin k'ata ju yuch ka lhi ta'ayalh kin la ju kinlakla'acha'ankan chay ju tatamakaulh.
- XXXV. Ju ka sk'inkalh, ka nabikalh, ka taylhi'ankalh chay kala'ts'inlhiankalh ju tumin ju chuncha ka lhi lakchibininkalh ju chuncha basalh li ka lhimispakana' chay ali ka amak'atsananankalh ju la'cha'anti chay ju ix lita'ayan, pulakni talak'ilhtun chay ix puta'aktayjun ju kin lakla'acha'ank'an chay ju tatamakaulh.
- XXXVI. Ka maxtukalh ju alhiki chay ka lhinaukalh ju lhich'alhkat chay ka naukah tasuncha lakch'apalhiankantah ju ix lhakapuanan kin t'amala'acha'ank'an chay ju tatamakaulh.
- XXXVII. Ju 'oxi ka xta'kalh tumin ta'a'tayjun lakin lakla'acha'ank'an, lakt'ikt' la'acha'an ju tanchun amapa'sikan la'acha'an, ju yu'uncha Ukxtinin li'antu ju cha'a a'tayjunu ju basalh ka lhakapu'ana'ju is la'cha'anti ju chux ix lhita'ayan ju xpulakni talak'ilhtun chay 'oxi kabaykalh.
- XXXVIII. Ka yabakalh ju Cha'a' Lhita'a'tayjun ju ix nabin Lakla'acha'ank'an, ju tantabilanah kin t'amala'acha'ank'an chay kanabikalh ju lhich'alhkat chay task'ini ju ka pua'tayjukana' ju lakcha'anti.
- XXXIX. Ju kalhichibinkalh chay kach'apakanchalh 'oxi lhich'alhkat ju chuncha ka tsukuya', kalhita'atayjuya', ka kut'iliya'chay kamak'atsanikalh ju yu ta ta'ayat'ajunka' kin talak'ilhtunk'an, ju lay tama'akan chay ju antu8 lah ma'akan; ju ix atalanintik'an chay tach ta masuy ju ix talak'ilhtunk'an xa la'ma'an.
- XL. Ju ka lhichibininkalh, ju kalakpastakkalh chay wasalh ka lhakapu'ankalh lhamap'a'sin ju chunch kalhista'kalhlh, ka ta chixli ju yu lak s'alalan pumatamin chay ju xlihu ju yu'unch kata la'ts'ilh ju xa lhistakni kin talak'ilhtun, ju xalakma'an atalaninti chay xa lak ma'an at'inti.
- XLI. Ju ka tailhiankalh mala'sin lhichalakat, ju xa taulan lhich'alakat ju xa lhich'alakat ta kut'ilin, ju katsukulh, ju xa atalaninti, ka makut'ilikalh, kamala'abanikalakalh ju kin

- chibintik'an lhi ani lakat'un, wasalh ka xta'kalh lhimapaxan chay tamacha'xin ju xa chibinti luban ju kin chibintik'an.
- XLII. Ka lhakapu'ankalh chay kalhi ch'alhkatnankalh ju chux kin Atalanintik'an ju chux laka ama'a'un. Chay ka atso'nunkalh ju lhimap'asin atalaninti chay ju lhi ta'atayjun ju ka pakxalh ju ix atapast'ak'at kin lakla'acha'ank'an katakut'ililh kin talak'ilhtunkan, xa chibinti ju tuchini tapasalh ma'anchach, ju lak cha'a' pamap'a'sin chay ju ix ta'aysto'nik'an kin la'acha'ank'a.
- XLIII. Ju kayajukalh lak cha'a' tan ka alhakapu'ankalh, katalaklanilh, kata 'amanalh ju as'at'an, atsi'in chay ts'alanin ju xa kin t'amala'acha'ank'an chay ju tatamakaulh.
- XLIV. Ju kalhichibinkal julhista'kaan, ju takut'ilinti chay ka nabikalh ju lhitak'uchun xala'ma'an ju ix nabink'an kin lakla'achas'ank'an.
- XLV. Ju kalhilakchibinkal chay kat'ama'ch'ixkalh ju Puchibin Ak'uch'unu' ka tatanuchalh ju k'in t'amala'acha'ank'an chay ju tatamakaulh, katama'anuchalh ju ix laktanlhun ju ta pu'ak'uch'unun, ka tachibinilh ju ix chibintik'an ba tam kata ak'uchunulh ju antu ba 'aya kala'ts'inkalh.
- XLVI. Ju ka'atayjununkalh chay kama'a'tayjununkalh ju chunch ka alhimispakalh ju ani laka Cha'a' Ak'uch'unu' ju tis mispay ak'uchunun ba tuchichuncha ta'an'at pakxankanta.
- XLVII. Ju kat'ach'alhkatnankalh chux kin la'acha'ank'an ju chuncha lay katach'apachalh, ju kataulalh, kata mach'alhkatnalhchay katats'apshialh ju ix amak'atsanti, ma'atpu'amak'atsanti ju ancha 'oxi ka talakchibinalh ju la ix talak'ilhtunti chay ju ix chibintik'an; bachu , chuncha kata tanuchalh laka ju pumak'tsanti chay ju puma'at chibijlaka'ankan ju ix'anu' ju tan lhi lhu chau tan ba mi akstu.
- XLVIII. Ju kat'ach'alhkatnankalh ju Cha'a ju Batamkalala'ts'iu , ju chuncha kalaya' ka lhilakchibininkalh ju ix ma'tanutk'an ju cha'o'olh lhima'alh'aman la ix lhich'alhkat Ukxtin lhi ani lakat'un chay ju tamap'a'si lakla'achan, chunch kamala'sikalh ak'uch'unti, kala'ach'inukalh chay ka min'olh ju ba 'ayalala'ts'inkan, antucha kala ma'talh'amkalh tach ju ix at'alakan ju cha'o'olh chay ju atsi'in ju kin t'amala'a cha'ank'an chay ju tatamakaulh.

XLIX. Ju kat'ach'alhkatnankalh ju Ukxtinin, kalhkapu'ankalh chay ka kinklakaikalh ju ix tala'cha'antik'an lhi chux lapanakni, chay xatalak'ilhtun ix'anu' la'acha'an chay kinla'acha'ank'an chay ju tatamakaulh.

L. Kalhinaukalh ka amapa'aukalh ju katamacha'xalh ju kin chibintik'an, ju yu'uncha ka ta'a'tayjulh kin t'amala'acha'ank'an ju chunch katask'inlhi, li lhita'atayjuy ju ix tala'cha'ank'an ju lisna tu'u talhasakminti ta lhi'ani ju Ukxtinin ju ix Lhi'ay la'acha'an, ju lhi'ani lakat'un, ju ani tan tatap'a'si lakala'achan.

LI. Ju ka xta'kalh atapast'ak'at li talhi ch'alhkatnan ju tu'u lhak'uch'un ju pakxanta ix ta'aut ju tailhtuta ju yu'uncha.

LII. Ju kat'ach'alhkatnankalh ju xa lhakapu'ankaan chay xa ta'alhtajin ix maklakata ju ta sk'intalh amak'atsanti. Ju lhi'alhts'auti, ju tu'u lhinauti, ix maklakata ju yu'uncha, ju ka tata'li ju tis ta Lhist'aka ju ix lhi chux La'acha'an ju Tala'cha'anti Lapanakni chay ju lhi ani Puebla.

LIII. Ka A'tayjununkalh ju ix lhimap'asin chay ka ama'a'onukalh ju lhimacha'xana' chay mapaxana' ju kin chibintik'an chay lhi laban.

LIV. Ju kat'ach'alhkatnankalh ju chuncha basalh li ba tanlay pumap'asin laka puchibin tan tabilanalh ju kin t'amala'acha'ank'an, ka'alilh ju ka mapaxalh ju chibinti.

Ju Cha'a A'tayjunu' Lakla'acha'an ka nabiya' ju tach ka lhi ch'alhkatnana' akxni nabikana'ju lhasakminti chay kata ma'tanulh kin t'amala'acha'ank'an, ju anch ka naukana' ju tach lakask'inau akxni basalh ka lhakapu'ankana' ju kin tala'cha'ank'an chay ka ta ma'tanulh ju Ukxtinin, ju lakaputayaninanin chay ju Cha'a' map'a'sininin ju ix'anu kin lakla'acha'ank'an chay ju tatamakaulh chay kata ma'ilhtulh tach ka ach'alhkatnankana' ju ix lhi ta'ayan ju ani lakat'un Puebla chay lhimala'sin ju lhita'ayan chay lhi mispan kin tala'cha'antik'an.

Ju Cha'a' A'tayjunu' Kin Lakla'acha'anka'n ka lhakapu'ana' lak cha'a'pumap'a'sin, ta'ayxto'ni, ju lhamap'a'sin, tach ka'ilhtukalh tu'u' chay tach tata'ayxt'o'a tamin lak la'acha'an tan ta ulay ju ix chibinti ju ix maklakata lhilhu' ju lhamap'asin.

PULAKT'UY

**JU TAMIN PUCHIBIN
CHAY JU IX
LHICH'ALHKAT JU
CHA'A' A'TAYJUNU
LAKLA'ACHA'AN ANI
LAKAT'UN.**

Ju Cha'a' A'tayjunu' kapakxana' ju ani lak puchibin:

- I. Pulaktam puta'ayxto'ni Ukxtin, ka juna' ju ix puchibin Ukxtin.
- II. Ju pulakt'uy ix puchibin Ukxtin, ju yucha ka ts'apshiana'ju alhiki;
- III. Ju la'atam Ta'ayxt'o'ni lhi ani Lakat'un ju ix'anu' kin Lakla'acha'ank'an, tach lhamap'a'sin, alhasakminti chay kat'a ch'alhkatnau ju lakla'acha'ank'an chay ju tatamakaulh, chay
- IV. Ju ix lhilhu puchibin ka ta ch'alhkatnana' ju ix maklaka'ta Cha'a' A'tayjunu', tach kata lhakapu'ana' ju ani lakat'un chay ju puchibin lakla'acha'an.

Ju Cha'a' A'tayjunu' kapakxana' ju chux Puchibin ju chunch basalh ka lhakapu'ankana' lhi'ani, ju lhi'abint'i tamin tamin Puchibin Lhich'alhkat chay ju Ts'aps'ulan Alhiki ju Lhi'ani Lakat'un, ju ali'in Ch'alhkatnanin Ani Lakat'un, ju Puchibin ju najunta 'Aya Lhamap'a'sin, ju bachu lhi najun ka lhi chalhkatnan ju ix la'acha'anti kin t'amala'acha'ank'an chay ju tatamakaulh, juixli akstuk'an ka ta nabilh ix atsukuntik'an chay ju ix akstuk'an ka tanabilh ju tama'task'ini.

Ju Ta'ayxto'ni ju Ukxtin chunch ka juna':

- I. Ka ulakana' pumatam T'aku usna Lapanak ju ix Lakaputayana' ju Ukxtin, ju yucha tuka'n Ukxtin xa ani Lakat'un.
- II. Ka ulakana' pumatam T'aku usna Lapanak, ju kaulaya' ju Ukxtin lhi ani Lajat'un;
- III. Ju ma bukalh ka a'ulakana' ju ma'ananin puchibin:
 - a) Ma'ana' ju Ukxtin;
 - b) Ma'ana' ju Lhimala'sin chay ju lhi Mapalan;
 - c) Ma'ana' ju Ta'ayan lak Ma'at La'acha'an;
 - d) Ma'ana' 'Oxi Atsukunti;
 - e) Ma'ana' ju Atalaninti;
 - f) Ma'ana' Laktiyan, Ka lapalh Kak'ibin chay ka Ts'abala'olh ju Lakat'un;
 - g) Ma'ana' 'Oxi Kataulakalh;
 - h) Ma'ana' Batam Kalala'ts'inkalh;
 - i) Ma'ana' ju Lhilakpixialhna';
 - j) Ma'ana' ju Tumin;
 - k) Ma'ana' ju Ta'nabin ju lhita'ayan La'acha'an.

I) Ma'ana' ju Lhich'alhkat.

IV. Ju pumatam Lakaputayana' ju Ta'astoni kin Lakla'acha'ank'an.

Ju tis ka ulakana' Lakaputayana' kin Lakla'acha'ank'an laka ?ay Cha'a' Puuta'ayxtoni, ba kaa chibinina' antu kamakaukana' ka ma'sakxtu'nulh. Ju Ta'ayxto'ni Ukxtin ka ulaya' Ma'ana' Ats'o'nut.

Ju Tukan Ukxtin, cha'o'olh usna lapanak, ju la ix chibinti xa Ukxtin ani ka nauna' tis ka ana' laka Ta'ayxto'ni Ukxtin chay ali'in lakaputayananin ju cha'a' puchibin ju xa Ukxtin xa 'Ay, ju lhi ani chay ju tatap'a'si lakla'acha'an, bachu ta'ayxto'nin tan lhi lhu ju ix akstuk'an ju talhakapu'an kata t'ach'alhkatnalh ali'in chay ju lay ju ix tala'cha'anti ka chibinalh.

Ju ta'ayxto'ni kamak'atsaya ju Ma'ana' Ats'o'nut, ju akxni ts'an'ay la'akisi bilhchan akxni ulakan bilhchan, chay puxamatati panch'e'ex li basalh ma'lhtask'inikan ju tu'u lhich'alhkat task'ini chay ka naukalth tuchini ju ix lanti.

Ju ix Ta'ayxto'ni Ukxtin ka nabikana' ju la'at'ati ta'ayxto'ni ju laka tam k'ata chay ju lisna las ma'talhs'ikan ta'ayxto'ni ju yucha ju Ukxtin ka nauna' masi ba ix pumat'utu kata ta'ayxto'li.

Ju ix Ta'ayxto'ni Ukxtin kata ta'ayxt'o'a masi ba paytat ju ix lhi chuxk'an. Ju xa taulan chibinti ju tata'ayxt'o'a ju yu'uncha kata nauna' tuchini katasakxtuya' chay ju ukxtin yucha kachibina' akxni ba tami ka taxtuyantaakxni ka sakxtununkana'.

Ju ix Ta'ayxto'ni Ukxtin ju yucha tukan ka nauna' ju ix lhi ch'alhkat:

- I. Ju yucha kanauna' ju lhimala'sin tanichuncha kalakch'apakana' ix maklakata ju ix lhi ch'alhkat tam k'ata, yucha ju sk'in ju Ukxtin.
- II. Ju kaulakalh atapast'ak'at ju yucha palay basalh task'ini laka Cha'a' Puchibin;
- III. Ju kala'ts'inlhiankalh chay kanaukalh mala'sin lhich'alhkat, tach ka nabikalh ju lhich'alhkat ju ka nabilhju puchibin ix'anu' Ukxtin, chay kata t'ach'alhkatnalh kin t'amala'acha'ank'an chay ju tatamakaulh ju chuncha ka la'ts'inkalh chay ka kala'lhkakalh tanchun chaánachalh ju ta'a'tayjun;

- IV. Ju kaulakalh lhamap'a'sin chay ts'o'ulakalh ju xata makajun chibinti chay katama'tanulh laka llich'alhkat ju chunch 'ayxtam ka t'alayau, ka'ka t'achibinau ju ali'in Ukxtininju ix lhi'ay ju lakat'un, ju lhi'ani chay tan tata p'aksi kin la'acha'ank'an chay ali'in ju ta ch'alhkatnan ix akstuk'an bachu katama'tanulh ju lhilhu ta'ayxtoni xa lak ma'at ju ix akstuk'an ta chalhkatnan ju chunch kata ma'tanulh ju kin t'amala'acha'an chay ju tatamakaulh;
- V. Ka naukalah li chun, masi antu kamak'tsakalh ju Ma'ana' ju Lhimala'sin chay ju lhi Amapalan, tu'u lakla'oxin ju lak Amapalanti ju kalakch'apaya' ju Cha'a' Aktayjunu' masi k'is lak mapaxalh ju apamalanti bayu antu ka tapasalh ju xta'kan ju tumin ju tanuyachalhn ju lhi mapalhkan mala'sin llich'alhkat chay ka 'oxi ka t'atxtuchalh ju k'ata.
- VI. Ka naukalah tani kat'alana' ju tumin ju xta'kantalh chay 'oxi ka lakch'apakalh bachu ju xajchalh.
- VII. Ka naukalah ju tacha kamalakpitsikana' ju tach ka naulh ju Ukxtin, akxni xta'kanachalh ali', ju chuncha ju lhamap'a'sin ju lhi Xta'kan ali lhimapalanti, ju ix lhimapalanti ju lhimispakan chay ka ta ch'ixli ju la'cha'anti chay ka tach'ixli kin lakla'acha'ank'an chay ju tatamakaulh.
- VIII. Ka naukalah li chun, tach kanaulh ju xa Ukxtin Cha'a' A'tayjunu'. ju lak ts'apsna' alhiki ju lhi'ankantalh mala'sin llich'alhkat chay ju ix tumin.
- IX. Ka naukalah li chun, chay ka naukalah tacha kamalakpitsikana' ju amapalanti ju lak tsaps'ulanti alhiki chay ka naukalah tasuncha ka amapalanankana' chay 'oxi ka k'atsakalh.

Ju Ukxtin ani laka Cha'a' A'tayjunu', ka ulaya' ju Ta'ayxto'ni Ukxtin ju ix lhinauti 'Aya Ukxtin.

Ju Ukxtin cha'o'olh 'amaj lapanak ma ka minchalh inta kin lakla'acha'ank'an ju xamati ju tatamakautalh chay 'oxi ka chibinalh kin chibintik'an. Bachu task'ini li lanan ka k'atsakalh tacha taylhi'ankan ju ix maklakata Cha'a' A'tayjunu' ju kalalh ch'alhkatnankan bachu lanan ka pakxankalh Atalaninti.

Ju Ukxtin, cha'o'olh 'amaj lapanak, lay ka lhinauna' ju ani llich'alhkat:

- I. Mala'sikan llich'alhkat, taulan lhichalhkat, ta'ayxto'kan, malhtanikan, la'ts'injukan chay la'ts'inlhi'ankan ju ix

- lhich'alhkat ju Cha'a' A'tayjunu', li 'oxi t'alat'ajun ju ix lhich'alhkat, ju ix maklakata ju najun laka lhamap'a'sin.
- II. Kaulakalh ju chibinti chay 'oxi ka t'alalhiankalh, 'oxi kalala'ts'inkalh chux ju lakla'acha'an tan tabilanalh kint'amala'acha'ank'an chay ju tatamakaulh, 'oxika kalat'achibinkalh chay katalhakapu'alh ju ix talak'ilhtunk'an chay ju xa 'oxi lakchibinti;
- III. Ju ka ilhtukalh chay ka xta'kalh ba tuchini alhiki ma'task'inikan chay lay ju ilhtuy ju Cha'a' A'tayjunu';
- IV. Task'ini li 'oxi ka alilh ju mispay lhi kut'ilinti, tats'apsni, lhilasat, ach'inti, bachu', lisna alin ju palay makxkay ka ts'o'ulakalh tumpaj alhiki. Lisna alin ju talhistakni,ka lakask'ina' lakatam ka ts'okalh tumpaj alhiki ka lakask'ina' ju ka naulh ju ix ta'ayxto'ni ju Ukxtin.
- V. Ju ka xta'kalh, ka mapaxakalh, ka xta'palakalh takut'ilin lhich'alhkat chay palay ju xata ch'ixni, lisna ka ts'a'achalh tu'u ka xta'kana' chibinti, chay ka ulakalha la'atam lhamapa'a'sin;
- VI. Ju ka chibi'ma'ankalh, chay achibima'anti li task'ini, ju chuncha, amak'atsanankalh laka ats'o'nut, bachu' ba talaktsin, bachu chunch ka nabikalh tach najun ju lhamapa'a'sin.
- VII. Ju kama'tama'aukalh chay ju antu kalhitamakaju,li kalalh batukan ka puxkaju ta'a'tayju laka ju alhiki.
- VIII. Ju kalakxapakalh ju tala'alhin chay kamatanunikalh ju ka ulakalh chibinti ju chunch ka min'olh talh'amt;
- IX. Ju nokana', ju ix maklakata lhich'alhkat, ju xa mala'sin lhich'alhkat ju najun 'Aya Lhamap'a'sin, ju chux ju alin lhamap'a'sin, ju taulan chibinti, ju ix tanabin ju Ukxtin;
- X. Ju kanabi'okalh ju ixlaknauti Ta'ayxto'ni Ukxtin.
- XI. Ju kamak'atsanikalh ju ta'ayxto'ni Ukxtin ju tuchini chibinti ta ulalh ju kin t'amala'acha'ank'an chay ju tatamakaulh;
- XII. Ju ka lhilaktamabanankalh ju tumin yu axta'nikantalh ju Cha'a' A'tayjunu' ju tach lhijunkantalh li kamalakpitsiya' tacha najun ju lhamap'a'sin, ka 'alhtaykalh tach najun tsapsna' alhiki, chay kamala'sikalh ju lhich'alhkat ju la'cha'an.
- XIII. Kalhich'alhkanankalh chay ju ka masukalh ju Lhamap'a'sin ix'anu Cha'a' A'tayjunu', ju chuncha yucha ju Ukxtin ka

nauna' li katamakauna'; bachu ju Lhamap'a'sin lhich'alhkat ju Cha'a A'tayjunu' chay Lhamap'a'sin pulakni ju xa tamala'sin ta'a'tayjun, vachu ju lakmapaxan; chay ka xta'kalh tas kalhi ch'alhkatnankana', tas ka ihtukana' chay tas ka lhakapu'ankana' ju Cha'a' A'tayjunu',chay
XIV. Bachu kalhakapu'ankana' ju lhinauti chay ali', tach najun ju Lhamap'a'sin chay ju ix Ta'ayxto'ni ju Ukxtin.

ju Cha'a' A'tayjunu' ka lhita'a'tayjuya ju ix ta'ayxto'ni ikin T'amala'acha'ank'an, Ta ma'tanun:

- I. Kautam Lakaputayanin kin lakla'acha'ank'an chay ju tatamakaulh. Ju ix maklakata basalh ju katama'tanulh ju lakla'acha'an ka ulakana chibinti ju basalh kint'amala'acha'ank'an chay basalh mispakan laka ju lhich'alhkat chay laka la'acha'an, mispay chay lay chibinin lhima'alh'ama' ju taulatalh lhi Ukxtin, bachu ancha katama'tanuya' ju cha'o'olh kin t'amala'acha'ank'an.
- II. Pumat'uyk'an lakaputayanin ju kataminchalh Ju Cha'a' pu Atalaninti chay puxkabanin ju 'oxi kata k'atsalhju ix atsukuntik'an kin ta'mala'acha'ank'an.
- III. Pumat'uyk'an lakaputayanin ta'ayxto'ni ju kin lakla'acha'ank'an ju talhi ch'alhkatnan ju tala'cha'anti chau ju lhi ta'ayan lakla'acha'n chay ju tatatmakaulh, chay
- IV. Ju tis kalakaputayaya' kin t'amala'acha'ank'an ju laka Cha'a' Ta'ayxto'ni ani Lakat'un.

Ju lakaputayanin ju najun xa Tapitsi I ka lhakapuankana' ju Lhamap'a'sin akxni ka ulakana' tas ju najun Ta'a'yxtoni Ukxtin, ju chuncha basalh junitalh ju lakaputayana'.

Ju ali'in tacha najun ju Tapitsi II III ka amapa'aukana bachu ka la'tsinkana' ju Lhamapa'a'sin ju ulatalh ju Ta'ayxto'ni Ukxtin, p'ulnaj ka maxtukalh pu'amak'atsanti.

Ju Amap'a'sinti Chux ani kin lakla'acha'ank'an ju tatap'asi laka Cha'a' A'tayjunu', ka la'ts'ina', ka nauna' chay kanabiya' atapast'ak'atlaka ju Ta'ayxto'ni Ukxtin, Malhtanini' chao'o'lh usa lapanak ju lhilakchibinti, mala'sin lhich'alhkat, ju chuncha ka mispakana' ju basalh ka xta'kana' ju ix la'cha'anti chay ix lhi tach'ixni lakla'acha'an. Ju Amap'a'sinti Chux ani kin lakla'acha'ank'an tamin la'at'tun malhkuyu kata ta'ayxt'o'a chay kalakaputayaya' pumatam kin t'amala'acha'ank'an ju yucha sakxtukana ju lakata'ayxto'ni akxni ba katsukuniyaaka'.

Ju Cha'a' A'tayjunu' ka pakaxana ju ix puchibin tan ka tola' ju Lakaputayana', ju yu'uncha ka lhakapu'ana' ju lakat'un ju ka nona' ju lhamap'a'sin ju ix maklakata ka chixli ani lakat'un Puebla, ju chuncha ka lhi ta'ayaya' ju ix pulakni kin tailhtunk'an lakin la'acha'ank'an chay ju tatamakauilh.

La'atamin puchibin ju lhi ani, bachu ka pakxana' Amap'a'sinti Chux ani kin Lakla'acha'ank'an, ju yuch kata la'tsp'inlhi'ana', kata ulaya' ju chibinti, kata nauna' ju lhilakchibinti chay ka mispakalh chay katakut'ililh ix la'cha'anti chay ju ix lhita'ayat.

Ju ix laktanlhun ju Cha'a' A'tayjunu', ju chuncha ka juna':

- I. Ju xa taxta'ni, ta'a'tayjun, makaminti, tamapasan, chay ta a'tayjun ju ka xt'a'a' Ukxtin ju ix lhi'ay Lap'acha'an, ju ba lhi anii, chay tan tatap'asi ju la'acha'an;
- II. Ju chux taxta'ni, chay ta'a'tayjun laka batuchichun ju ix ta'aut ka taxta'li lapanakniusna tu'u' lhamap'a'sin, ju ix'anu' chux lapanakni chux li'ani lhi palay abint'i chay lhi ani;
- III. Ju ix laktanlhun chay xa cha'a' ju kalaktamaukalh ju yucha ka pu ch'alhnankana';
- IV. Ju xa as'at'a, xatalhaja, xalakmapitsin, ju ta lhabalh, ju tamach'in, chay ju tanuyachi laka lhamap' chay
- V. Ju tumin ju tanuyachi ju ix maklakata taxta'ni alhiki, ju ta'atrsalh ju lhich'alhkat, kamaxtukanchalh, ka lhakapu'ana' ju lhamap'asin.

Ju ix laktanlhun chay xa cha'a' ju ix'anu' ju puchibin ju chux laktanlhun ju puchibin, ba ix t'achun ju ba tanlay lak tamaukan, ju antu lay ka st'akana', antu lay ka maxtukalh ba chuncha kalakmakaukalh.

Ju Cha'a' A'tayjunu kalaktsapsla'tsinkana' ju yucha k'atsay tani kalhist'ak'a' chay 'oxi ka t'axajchalh ju lhich'alhkat. Antu tu'u ka tsan'alh chay kalhakapu'ankana lhamap'asin.

Ju ix maklakata lhich'alhkat chay ju ch'alhkatnin kata la'ts'ina' ju lhamapa'sin. Ka lhista'kana' ju Cha'a' A'tayjunu ju ix pulakni ka'alina' la'atam ta'ayxto'ni ju yucha ka lhist'ak'a' ju Ukxtin ka ulaya' ju yu'uncha talaklhist'ak'a' ju yu'uncha ta pakxantalh ju xa kut'ilinti.

FICHA TÉCNICA DE LA TRADUCCIÓN	
Lengua	Lhima'alh'ama'/Tepehua
Variante lingüística	Tepehua del Sur
Estado	Puebla
Alfabeto utilizado en la traducción	Norma concluida y abalada por INALI
Título del documento traducido	Síntesis Ley Desarrollo Pueblos Indígenas
No. de cuartillas	18 cuartillas
Fecha	24 de marzo de 2023
Nombre del traductor (a)	Arturo Allende Téllez
Comunidad de origen del traductor (a)	Mecapalapa, Pantepec, Pue.
Observaciones	Tuvo muchos tecnicismos, pero fueron interpretados, para poder ser entendido